

Seizhaenx, dwg mwh yiemzdaj ceiq youqgaenj, gak danhvei lingidauj mbouj miz bouxlawz gamj oetngaenz aeungaenz.

Ranz Vangz lauxsae youq rungh-gungx, ranz de cij miz song duz yienzgeq caeuq duz gaeqmeh geq he.

Vangz lauxsae daigo gaenq ndaej 25 bi lo, de laebdaeb camgya 5 baez daigo cienjcingq gaujsi, moix baez gaujsi gij cingzciik de cungj baiz youq baihnaj, danhseih, de cungj fouz-yienz cienj ndaej cingqsik lauxsae.

Miz geij baez, de dingqnyi bouxwnq youq raeblaeng ngeixlwnh, danghnaeuz mwngz gauj ndaej hwnjsienq le, itdingh aeu byaij “doulaeng” cij ndaej. Couh yiengh-neix, de dauqma ranz, ninz youq gwnz mbonq siengj le buenq hwnz: Ndaw ranz gou sam daih gaxgonq wnggai miz caencik dangdaeuz ba! Nyoeb bae nyoeb dauq, doeklaeng de gaem ndaej gofiengz he. Yen Minzcwnggiz Vangz fugizcangj couh dwg boux caencik sam daih gaxgonq de. Couh yienghneix, de gietdingh byaij diuz roen neix.

Bi’ gvaq nienzdae, de dingqnyi naeuz miz daigo cienjcingq gaujsi, de sikhaek gaj duz yienzdaeg geq bae, daiq haj roek gaen nohyiengz caeuq 10 gaen laeujgaeuq, gig angq dwk ganj haeuj ndaw minzcwnggiz bae lo.

Baezneix Vangz fugizcangj ciep aeu gij doxgaiq neix fwngz cungj unq liux, gwn laeuj noh ndei cungj nywnx dwk haex bongh siq caez.

Hoeng, nienzdae gvaq le goj mbouj miz daigo lauxsae gaujsi. Vangz lauxsae beg caj baez he lo.

Seizgan gvaq ndaej gig vaiq. Daengz bineix, youh miz aen siusik ndei ndeu cienz daeuj, baezneix caen miz daigo lauxsae gaujsi cienjcingq lo. Vangz lauxsae couh dawz duzyiengz meh geq gaj bae, youh lumj baezgonq nei, daeuj daengz ndaw minzcwnggiz ra Vangz fugizcangj, song boux gwn laeuj fiz daengz mwhlawz cungj mbouj rox.

Gaujsi gvaq le, gij cingzciik Vangz lauxsae cij baiz youq daih 36



mingz, ciuq 1:2 mbouj ndaej hwnj-sienq.

Vangz lauxsae gietdingh riu j duz gaeqmeh geq doj neix, byaij haeuj yenveij suzsegi, daeuj daengz ranz Vangz fugizcangj. Baezneix dwg banringz, song de cij gwn di laeujbizciu j he. Gwn sat le, Vangz fugizcangj couh heuh Vangz lauxsae riu j gaeq dauqbae, de naeuz, cungj dwg caencik, mbouj yungh daiq hekheiq lai. Vangz fugizcangj lien z doi daiq nyoengx Vangz lauxsae ok dou bae lo.

Vangz lauxsae caiq sam naeuz dawz gaeq louz roengzdaeuj, gij naj Vangz fugizcangj lumj najmax baenzneix raez, gig mbouj angq lo. Vangz lauxsae cix naj rwd nding rwd heu, cij ndei youh riu j gaeq dauqbae lo.

Gvaqlaeng, Vangz lauxsae caz rox, yienzlaiz, gij singq Vangz de dwg gungdenz Vangz, gij singq Vangz fugizcangj dwg sam vengz Vangz, cuzbuj gyoengqde caemh mbouj doxdoengz.

sei sanjvwnz

Duzmoed Ndaw Rumz

风中的蚂蚁

□ Vangz Yinzfungh

Duzmoed raih daengz byai mbawfaex seiz, fwt bongj daeuj raq rumz ndeu, mbawfaex bibuengq haenq, caiqlij baenq bae baenq dauq, duz de got maenh mbawfaex, doenghfwenfwen yaek doek roengzdaeuj, hoeng, doeklaeng hix mbouj raen doek roengzdaeuj. Aen cingzgingj neix ciengzseiz yaenq youq ndaw da gou.

Gou hix dwg duz moed he, raih youq ndaw ndoeng ganghginh caeuq suiujniz, hix bungz daengz rumzhaenq caeuq fwnraq gvaq, moix daengz seizde couh gamj-daengz gig rengznaiq caemhcai j mbouj miz byawz daeuj bang, gamjdaengz swheij iqet, cingz-gvang doxdoengz, duzmoed siengj maz, gou mbouj rox, hoeng, gou cijndaej yo youq ndawsim swheij,

gag rub baksieng swheij.

Gyanghaemh, ndang gou gig naet, uk gou cix boq ok aen cingzgingj miz roeg ciuz caemh-caiq miz va hai homfwdfwd, roxnaeuz naehang fung fanh leix, caiqlij mizmbangj cingzgingj hawj gou lau dwk ndiusingj.

Gou mbouj couh dwg duz moed youq ndaw rumz haenx ma?

Youq mwh gyahung Liujganh, sweigih doengzseiz lij hwnjguh caeuq dauqguh le buek ganghdezcanj iq ndeu. Daengz bi 1975, daengx gih bi guh ok faz 12.8 fanh dunh, fazndip 23.2 fanh dunh, ganghcaiz 10.8 fanh dunh. Gijneix doiq Guengjsae fazcanj gunghyez gihgai caeuq doidoengh nungzyez gihgaiva, miz gij cozyung cibfaen youqgaenj. Doengz-seiz, swcigih yungh gij gangdiet doyawz haenx caeuq gij sengsi wnq doxvuenh gij doxgaiq raeuz gip aeu haenx, doiq gensez Guengjsae caemh mizleih.

Mwh Veiz Gozcingh lizhai Guengjsae, Liujganh gaenq baenz aen giyez doxgapguh cunghhingz ndeu, miz gij sezsih byagvangq、lienhdiet、lienhfaz、lienhciu、daenz-gang caeuq mizgven dajcoih、dajyinh nem vaqniemh bonjfaenh haenx. De itcig gvansim gensez Liujganh, cigdaengz de yaek gvaqseiq song bi gaxgonq, couh dwg bi 1987 ndwen 8 ngoenz 5, de lij ciepsouh gij cingjgouz Liujganh, raiz hwnj “Fazcanj Ganghdez Gunghyez, Gensez Seveicuiyi” diuz daezswz neix hawj Liujganh,

caemhcai j doiq gij dungzci Liuj-ganh naeuz: “Liujganh byaij daengz ngoenzneix mbouj yungzheih, Guengjsae ngamq miz aencangj dog, cingj bang lwnh gyoengq goengdaeuz caeuq vunzhong Liujganh, aeu gensez Liujganh engq ndei bae, dawz swnghcanj guh ndei, dawz gwndaenj guh ndei.” Seizneix raeuz ndaej nai Veiz Gozcingh naeuz, Liujganh ginggvaq lai bi gaijgwz hailangh, youh miz ndaej fazcanj moq lo, faz、diet、caiz bi swnghcanj naengzlig cungj ndaej mauhgvaq bak fanh dunh, canjbinj gai daengz daengx guek 20 lai aen sengj、si、swcigih, mizmbangj lij gai bae daengz Yizbwnj、Feihlizbinh、Daigoz、Munggyahlah、Sinhgyahboh daengj guekgya dem.

Fazcanj gangdiet, aeu miz meizdanq. Guengjsae dwg gizdieg meiz noix ndeu. 50 nienzdaih geizlaeng, Veiz Gozcingh cingj gvaq boux diciz bucanj、boux canghhag diciz okmingz Lij Swgvangh daeuj Guengjsae, bang faensik、buenqduenh gij canggvang diciz Guengjsae. De caemh caenndang bae daengz daih-itsienq guh diucaz, bi 1958 seizcin, de dingqgangj Liujcwngz fatyienh daenz miz meiz, de sim gig angq, caenndang daiqlingx mizgven vunz bae ndonj yiuzmeiz gizde. Gij yiuzmeiz iq neix, cungj dwg cungq-vunz gizneix ngamq gag guh hwnj-daeuj, haujlai giz aeu ruenz byaij, ndaw yiuz youh oem youh hwnq, de caeuq daengxcungq doengzcaez ruenz,

baez ok congh daengxndang cungj youh aeu j youh ndaem. Gij dungzci bonjdieg gienq de yietnaiq, de naeuz mbouj, dauqfanj youh cam gyawz lij miz yiuzmeiz, caiq bae yawjyawj dem. De youq Liujcwngz gungh baenq sam ngoenz. Ginggvaq gij bumwnz mizgven diciz、meizgvangq haenx caez roengzrengz, yienznaeuz Guengjsae ra ndaej mbangj diegmeiz miz itdingh gyaciz haivat, hoeng cix itcig ra mbouj deng gij diegmeiz hung naengz haivat haenx, daegbied dwg ra mbouj deng gij meizyenzdenz mbouj miz hoenz naengz gunghawj lienhciu haenx. Gij ciumeiz Guengjsae so j yungh, ciengzgeiz gvaqdaeuj cujau baengh diegrog gunghawj.

(caengz sat)